

زينب الشاذلي

نَبْضُ مَهْرَةٍ

أشعار بالعامية المصرية

الطبعة الأولى يناير 2018

بطاقة الكتاب

المؤلف : نبض مُهَرَّة
المؤلف : زينب الشاذلى
التصنيف : أشعار بالعامية المصرية
رقم الإيداع : 2017-29411
عدد الصفحات : 100 صفحة
رقم الإصدار الداخلي : 106
تاريخ الإصدار الداخلي : 1 - 2018 الطبعة الأولى
الإشراف الفنى والمراجعة : الشاعر جابر الزهيرى

جميع حقوق الطبع والنشر محفوظة للشاعر، ولا يحق لأى دار نشر
طبع ونشر وتوزيع الكتاب الا بموافقة كتابية وموثقة من الشاعر

دار النيل والفرات للنشر والتوزيع

سجل تجارى : 13242
بطاقة ضريبية : 165-5-00031-572-01-35
رقم التسجيل : 2017-7 544-662-202
E-mail: alnile waalforat@yahoo.com
twitter: النيل والفرات
youtube: alnile waalforat@yahoo.com
facebook: alnile wa alforat



هاتف : 01011256943 - 01116202218 - 01202541192

الشرقية - العاشر من رمضان - مجاورة ١٣ - عقار ٣٠٤ - الدور الثانى - أمام سنتر ١٣

الإهداء

لكل حروف قصايد لسه ما اتكتبتش

ع الأوراق

و محفورة ف وجداني

زينب

مفتتح

حالة غزل

بس ابتديها منين

قلوب وطار

فى الهوا الاتنين

فوق بحر هايم

م الغرام والوجد

والحالة جد

والرمش قام الحد

فرد الجدايل ورد

فتح على الخدين

دييب

حكاية حب مقتوله

فى شارع عام

لقتها عيون الناس

.... مذهولة

حضنين يمام

على صورة بتنقط دم

لما إتفرط ع الارض رسم

قلوب معذورة

على فكرة دا مش إعدام

دا حب بدايته مكسورة

ونهايته بقى إلهام

شروق

أنا والمُهر ف المية

غلبنا الشوق

وكيف نعطش

ف قلب الموج

وكيف نغرق

ف قلب الطوق

ومن يومى على شطّى

وأنا المشنوق

عشقت النسر بجناحه

الى علا لفوق

ينفض حبويه للندى
على ورد بات محروق
تطرح سنابل هواه
كل الشموس ف دماه
تحلف بأنى شروق

دندنة

ملالى القمر كاسى

بخمر النور

لقتنى بعبى أنفاسى

على دمة قلم مكسور

عشقتى وصار وناسى

وللم عقدى لمراسى

فردنى بحور

وهبته شمع إحساسى

غزلى بدور

واموت لو مرة بات ناسى

ملاحى الحور

راح ارفع فى هواه راسى

واحلف ع الزمان ما يدور

تغريدة

(1)

وكل الأرض

طرحت زهر علشانى

فرشت عبيره

غنوة بديل فستانى

حلفت إنى وتر العود

وسحر الورد يهوانى

وان دبت خطوتى

ع الأرض

تهيم الدنيا بكيانى

(2)

موجوع أنا

بكلام ف صدري

ما كتبتوش

أصل المشاعر

لما بيفيض بيها الوجد

بتحكيها الوشوش

(3)

ولما حكولى

عن بحرك

وطفلة عايشة

فى ملامحك

وقلب .. نفض الهموم راحك

وفى الفجر

أهو باحك

إن الأرض لو ناشفة هتطرحك

(4)

على دمعى

عزفت الآه

فى قلب المحنة

الى أنا فيها

لعينك من النغم أحلاه

خلى النوم يجافىها

يقول لي من الوجد الله

عذابك جنة أبغىها

تاھت المواعيد

صباح بياخذنى لعيونكم

ومن هنا لبعيد

أنا نفسى تفرشوا رموشكم

لجلن أصلى العيد

دا انا لما عشقتكم غنيت

وهويت السهر والليل

وصادفت القمر والويل

وبرضه ما اترديت

حكمتوا قلبى بالربابه

بحروف كما التغريد

ما عدت حاسس بالزمن

وتاهت المواعيد

وانا نفسي تفرشوا رموشكم

لجلن أصلى العيد

مغرم

يا قلب .. يا مهموم
وامال بتتألم
والحرف لو يسكت
دمه هيتكلم
حنين فى صوت مبجوح
والوجع علم
سلم دراعك يا قلم
حد السيوف تلم
وانا م الليلة دى هطوف
بربابة و اتحرّم
أنا أصلى مغرم صباية
وعشقى للفدا نسّم

يا مصر

يا نبض قلبي الحى

شاورى لحبيبك

راح يجيلك طى

ويسبق مراسيلك

عشق الخلايق تاريخ

شاربينه من نيلك

يا حبة القلب

غنى وانا احكيلك

انا الفرعون

لو الغادر لمس طينك

وأنا موسى وجيش فى غناك والعوزة

وأنا الدرويش فى الحضرة

وروحى بيكى ممسوسة

وعايش بس اهديك

وريد الدم

وكل الدنيا تشهدك

" بـانك " أم

على أرضك عروبة تضم

وفوق رملك يدوب الهم

وعشقانى فى مواويلك

واناديلك ... يا مصر

يا مصر " العزة وكرامه "

ومش هتباتى منضامه

فِي يَوْمِ أَنَا لَسَهُ فِيهِ عَاشِشٌ
بَعْلَى صَوْتِ تَرَاتِيلِكَ

احتلال !!

إحساسى بيك من أوله

مش انفعال

أحاسيسى كانت طبطبة

بتهون كل شئ محال

كنت بقول انه زيك

زى اللى شايفين الدلال

هاحجر على قلوب العباد

بتسبح لما بتشوف الجمال

صرخ قلبى بصوت

كان خارج الاحتمال

قلبه زى الزرعة طالعاه

وحدها بين التلال
نسمة واتولدت عشاني
قالى حبك طعم تانى
صمتى بيهز الجبال
بحرى لو غريق وعالى
شطه متخصص آمال
واللى كان غريب حقيقى
وافق قلبى بالاحتلال

حاله

لفتنى باحتوائك

فاجئتنى

درعاتك بعرض الكون

بتهنئنى

وقفتنى...!!!

وسط الزحام

والطريق .. ما يبيل ريق

صالحتنى

انت راجع تحيا بيا

ولا .. فيا

موتّنى ..

موت اللى منى

ماعدش ينفع للحياة

خلقت فى

بدايه ملهاش منتهى

.. زلزلتنى

حتى لو حياتى كلها

اترتبت على كلمة واحدة

هيا آآآآآآآآآآآه

غيرت معناها

مسه سحر قاصده

توهبلى الحياة

.. علمتنى

إنى أعيش مش كفاية
إنى أضحك مش كفاية
ولو باخلى الكون بحاله
يضحك معايا
منحتنى

عيونك أشوف الدنيا بيهم
ولو بتفكر تاخدهم
كنت ليه بتتورهملى
سيبنى أكمل
اللى فاضل ليا بيهم

موجه

جوايا موجه

بتهيج كل رمال الشط

وبتمسح كل العلامات

وحصون .. وبيوت

آمال .. تنهد

شكل الطرح اتغير فيا

وحروفي اترسمت ع القد

حتى التمر اللى مكانه

فوق النخل

بقى طارح على وش الأرض

مجنون !!

صحى الحرف الساكن فيا

والصوت مابقاش له رد

مسح الشوك من كل الورد

شق القلب النائم شق

رسم الأيد

فوق على الخط

وصل لى وريد

نازل مد

انت المجنون

اللى ملوش حد

صحى الحرف الساكن فيا

والصوت مابقاش له رد

كنت ركبت الريح وجريت
و بسنارة سهمه العالى
مزج النار والنور ع الخد
صب الميه فى قلب النهر
الى جفافه سنين ممتد
انت المجنون
الى ملوش حد
صحى الحرف الساكن فيا
والصوت مابقاش له رد
فيك أصوات بسمعها
هيا كتير .. ملهاش عد
الى هينفع أقوله بجد
لمسة ايدك لهدومك

ملهاش صوت

جد؟؟

رمش عيونك

فرحك وف وسط همومك

ملهاش صوت

جد؟؟

مشطك سارح ف شعورك

ماسكة قلمك وفنونك

ملهاش صوت

جد؟؟

دم وريدك رايح قلبك

لما تلف ايديك

حوالين النخلة بتاعتك

ملهاش صوت

جد؟؟

انت المجنون

الى ملوش حد

صحى الحرف الساكن فيا

والصوت مايقاش له رد

جميل

ليك ف رقبتى جميل

جوايا .. عايزه ارده

واستحلفك

بالزمان اللى وقفته

ما ترده

كنت فى نظرى معنى كبير

كنت بقولك

اوعى تهده

انت اللى شغلت التفكير

لكن ... سبته

كنت ف نفس اللحظة

معايًا .. ومع الغير

راغب حبه

كنت سفينه

ونسمة و طير

وحلم عشقته

لكنا وبدون تحذير

قلبي ضربته

بسهم وخنثه

بعدك انا بطلت اغير

والحب له معنى

انا فهمته

تعرف انك كنت قدير

قدام قلبی

عملت قتیل

وانت قتلتہ

حرفين نغم

حرفين نغم

ياللى رفعت العلم

شديت الزمام

وقعدت وكلت الحمام

وفردت روحك ف الزحام

وحلفت ترتيلي

تسمع تراتيلي

انا هابقي يوم قدام

و افرش مناديلي

وافديك بضى العين

ترجعلى .. وتجيلي

وترابى عطره سلام

حدوته

صرخت من عزم ما بي

وانت ما رديت

ما هو نفس صوتي

اللى سمعته ودوبك

كأنك نسيت

الحنين اللى وهبته

واتولد ملو ابتسامته

والقلب اللى عشقته

لو ينادى عليك

تقولى .. ما سمعته

كنت عايش ميت .. حى
واللى راح شبه اللى جى
واما عطشت
لقيتني مي
واما تهت
لقيتني ضى
دلوقتي جى
تتنكر للى عرفته
مش هو حبي
اللى سهرت الليل عزفته
وهو كاس
لحد آخر نقطة فيه
شربته من حلاوته

قولتلى ان عمرك

قبل منى ما حسبتہ

قد ايه صدقت فيك

قد ما آمنت بيك

يصرخ كيانى ويناديك

أحلى كذب

انت كدبتہ

عينى مش ناويه تلاقية

حتى لو جواها صورتہ

قلبى لو بالنار اكويه

لجل ما امحى

حتى سيرتہ

ولو مابقتش الكحل

ف عینه یزینها بیه
یبقی عندی مداس لبسته
لو روحی فیه

شبابك

شبابك فوق صخور الصعب

شائلين المحال

لو مجال اكتب وأغنى

وأحكي عنك

ناقشة فوق البردى فنك

والزمان رتل قصايدك

والحروف نحتت حجر

تدلى على إيدك ورود

يحلي صوت همس الشجر

.....والقمر

دا حكاية تانية

لما تفاحك يطيب
والسواقى غسلها يطيب
يا للى بتشدى الغريب
بيبات ف حضنك
رشفة من شهدك يطيب
يرتوى كيف العشيق
يقضى عمره ما بين سؤال
فى الرمال مدفون جوابه
ولسة بيهز الجبال
بس فيكى
ربى وزّع
كل آيات الجمال

عتاب

سكت ليه ؟

خفت ليه إنك تصارح

مر صوت الصمت جارح

فوق سنين الدمع طارح

تقصد إيه

ما إنت بعث بكل طاقتك

وإنتهت صورتى فى مرايتك

هيم وندنلى بحكايتك

هيفيد بإيه

ليلى ماتت من زمان

عشقها كان له أوان

يبقى اطلال المكان

نبكى ليه

وما عدش معنى للسؤال

سكت ليه ؟

روح الربيع

اكتب بدمك

إن حبي صار عبادة

اكتب يا صاحب السعادة

اكتب يا صاحب المعالي

إن روحى هواها غالى

واللى قرر إنه يرحل

جوا أفكارى وخيالى

يبقى خد لقب السيادة

.....اكتب

إن أنا روح الربيع

شاوّر لكل الأبجدية

راح تطيع
تخفّض جبين كل المعانى
لصاحبة الزوق الرفيع
إكتب وقول
إن الحنين خلاك تحس
إنى إلهامك وبس
وإن لو منى
مجرد همس
تحيا ف الكون المشاعر
قرر يا شاعر
على العشاق
إنى أول درس

شكل تانى

لسة بتعلم فى حبك

كل معنى

والوجود يتهجى إسمك

ياللى أسمى

تاريخ فى هيبتك

سحر نينك

والسما رسمه بطبيعتك

ليل وزرعة

لما بلمح طيف عيونك

شمس طالعة

روحي بترفرف ف سربك

نفسى أحبك

نفسى أحبك

شكل غير كل اللي فات

حب بيغازل براءتك

لمعة فى عيون البنات

وإن مكنتش مُهر

متعشق ف أرضك

يبقى حقك تزهدينى

بس لو يوم لاف بعقلك

.....تحتاجينى

نبض قلبك فوق جبينى

ورافعة هامتى

يكفى أقولك يا حبيبتي

لو زمان أتقت حبك

فى الزمان ده

وفى يقينى

إنتى بالنسبالى دينى

هل معقول !!

أنا والله جدا عاوز أقول
إحنا تاريخ وحضارة ونيل
.....مصريين

محترفين الزوق والدين
كل تيجان الملك انتصبت
على رسمة هرم الفراعين
رمز الخير محفور ف الطين
رب العزة قال فى كتابه
إدخلوها آمنين

هل معقول ؟

هل معقول يخطر بخیالنا ؟

إن شعارنا يصير منقول
إحنا الأصلي ومش تقليد
عمر ما ندّي جبيننا العالى
غير ف العالى
ولينّا علامة وبصمة إيد
واما رياح الصيف بتعدى
عمر ما هدمت فكر وقول
إحنا الهمه وإحنا اللمه
ولما الفرع يميل لو حبه
لينا أصول
أنا والله جداً عاوز أقول
لغز المصرى بكل جدارة
لسة الكون بيشفله حلول

شكوتى

أمد بشوقى

مش طايلة

ولو نسمة

.....وقلبى

من الوجع بيطيب

وأقول قسمة

وفكرى صديق

وصدرى يضيق

على الآخر

.....وبيطبطب

كفوفى طريق
أنا ميت
وروحى لسة بتعافر
وشوقى خلاص
ما عاد قادر
وتهجرنى وبتساهر
وبعرض شكوتى ليلا تى
واهاتى والقمر سامع

رمشك شابك

كنت بتحكى عنها معايا

أسمع وأنصح

وأكبح أحاسيس من جوايا

وأنت بتوصف حبك ليها

ببيكى هوايا

لحظة بلحظة

كنت بعيشك

وأنت معاها

كانت روى

بتسبق طيفك

وقت ماكنت
تروح تلقاها
رمشك شابك
رمش صباها
وانا بتفادی
تباً للحب وهاتحدى
لو لفيت العالم أجمع
راحتك بس
فى حضن رضايا

اتمني عليا

طرح قلبك سؤال عني

وقال للشعر جاوبني

ندي جبين الحرف

لما هم يكتبني

طلب قلبك

إني أكون

طير بره حدود الكون

القط أشعارك وابدورها

للحب عيون

يشربها العاشق يتحول

الهام مجنون
طبيب قلبك ابقى أنا
لما رميت رمش عيني للسما
هز القمر في مداره
عشقتني أوتاره
كتبلى اتمني عليا
فاخترت اشعاره

نبض الحروف

نبض الحروف بيئن

لما تحن

وحنينك يبقى

دموع وسهر

هوانت طريق

مرسوم على الايد

ولا انت قدر

أمشيلك دوم

وادوس على اللوم

لو حد ف يوم

قال أنه غدر
لو أتوه وأضل
مش هاعشق غير
أحضان الفل
وهدوس على كل مرار عشته
وكسرت الكاس اللى شربته
وهاعيش إحساس
هايم وحده
وهدوس ع الناس
واعلن للكل
مش هاعشق غير أحضان الفل

عيونك الحلوين

يااااااه

يا شط عيونك الحلوين

و انا مجدافى مش وافى

لقطف حنين

أنا الواد اللي ساكنك

بضى العين

قلتلى مرايتك الوردى

سكنتك كحل بين شطين

وتنهيدة على الكورنيش

ف عز الصيف

حرير فايت
على الخدين
وانا اللي شربت من كفك
وبات اتوضى بلامحك
واعبد ربنا فيكى
تهيم الروح وتندهلك
وتدعى ربنا بيكى
يقول النبض آمين

معناه الكلام

فضلت ابكى لحد م استكفى

لا البحر ساعنى

ولا حنت الدقه

وسقانى الهجر

من كاسه الذى وفا

عشقتنى نار

وقلبى بات ما ادفى

أمانه عليك

ياللى تعيش العمر تتكفى

رمشة عيوني دوا

للّهُوا اذا غَفّا
ونسمة من عبير الورد
يروّيها المطر هَفّا
قول للوله
إنى أنا
عروسة واتولدت بلا زفة

آخر شهقه

مش بنكر

لما بتوحشنى

بيعت عينى

تبص عليك

من ورا شيش أحلامك

بخرج من جواك واتكلم

أحلى كلام يخطر بخیالك

إسأل روح ف السكره

ليه الراهب بيعيش زاهد

بعد م يشرب شهد الخمره

وتبقى السكره خلقت عابد

شرف الموت
بيبان ف الوقفه
.....لما الزفة
حرمت قيس
شقت شريان الأحاسيس
هامت ليلى
تجمع كل دموع المطره
لجل متعمل منها حجاب
.....والأوجاع
خلقت ميت باب
طلسم حير كل السحره
واللى إتبقى
من حكايتهم

كاس متعبى بآخر قطرة

شهقت نفسى

آخر شهقة

وانا بشربها

البحر بيمسى

أنا عاتب على الدنيا

إنها ثانية

هناحقها وتهتدى

ودا نصى

ودا وعدى

كتير على طررك الوردى

انه يبقى سبيل

يسقى الحزن ويعدى

رهنت عليك

بتتوقف وبتهدى

عشان البحر بيمسى

ف هدوء الليل

ويصبح سيل

تغنيه عيون الشمس

أنك مش مجرد همس

وبيدندن على عودى

حرفك حياه

فوق الحياه

تمد الدم لعروقى

وصفه

ولسة برضوا عثمانه

فى طاقة نور جوايا

تملى عنيا شيفاهها

وشفاها مراية الروح

صعيب ع الننى يتحمل

وجع مجروح

وتتزل برودة الليل

بقلب عليل

أنا محموم وبهاتى

ووصفوا الصبر للمحروم

يسأساً مهجته ليلاتي

ويتكرر

لو يعود ويفيض

ولو فاضل من غرامى وميض

أعيشه فرید

وأنا على محنتى قادر

صعيب قلبك

على مهلك

لما تدوس على قلبي

على مهلك

منا المحبوس بزنزانتك

ومش محسوس

ومن إمته

وانا المهجور بمشاعرك

غيطان الروح

أنا فيها سنابل بوح

طيرها الهوى المجروح بقساوتك

على مهلك

نساييم بكر بردانه لدفي شطك

حنين هايم

ف عرض البحر يندهلك

صعيب قلبك

فضفضة

قعدت اطبطب

على جرحى بداويه

بدون قصدى

لمس حسى وجع فيه

آآآآآآآآآآآآآآآآ

بقالى زمن

مجيتشى جنبيه

وكل ألوان الورود بداريه

وضحكة حلوة

للى يشوفها

ترد روحه فيه

بس اللى يفهم

لمعانة الكلام يلاقيه

الطير بيرقص وجع

لما اتغدر بيه

حکایتی

الورد دا حکایتی

غمازه فی ضحکایتی

لونه بلون مهجتي

نعومته دی آیتی

نايم علی رموشی

ونداه علی خدی

واما کتبنی الورد

"قال" دی حکایتی

هاقل الشباك

وعد منى

وأبقى عدها عندى

دمعى اللى هاجرنى

بقاله سنين

جرى نهرة على خدى

فتحت شباكى

وطاوعتك ... على عندى

وناجيت القمر باكى

طرح ف شباكى

حنين ودى

وأنا اللي مش قادر
وجرحى مسابقتى
فى سكة حيرة ... ورمتنى
لا نابنى فيها حلاوة الروح
ولا الليل يسكتنى
هواك اللي بات مدبوح
داير بالدفوف ... بيطوف
يسجدنى
أنا هقفل الشباك
وأحلف إن هواك
مش راح يعاودنى
ألقاه معاودنى

ريشة الشعر

همسك ريشة الشعر

ف ايدى

بس لازمى

علشان أكتب

يملا حنين الحب ويريدى

يسقى جبين المهر الغالى

من تنهيدى

هاخذ الحرف

وهرقص بيه

عزف مقامه من تلحينى

والورد الناييم على عودى

يبقى نسايم
تغزل تفاحتين لخدودي
هعمل حفلة للعشاق والمشتاق
الكل هيكتب ويخلينى
اسمع م الطرب الجوانى
الى حواكم واللى حوانى
اصل ف حب الشعر أنانى
واللى قرانى
يلمح طيفه الى بيحيينى

كلمات

مصر يا أمه

يا سفينة

طير مرفرف ع المدينة

قوليلي يا امة

انت فرحانة النهارده

ولا لساكى حزينة

هتبحرى فين الساعادى

ردى يا امة ع السؤال

قولى مش بتردى ليه

طب ياريتك رستينا

أنه عيدك

وأنه لساكى حزينه

وأنه لسه حاجات كثير

معملتيهاش

بس يا امه

أوعى تنسى أنه عيد

وتسيبينا

أصيل

الناس معادن وأنا

وصفت أنك ماس

وكل واحد من اسمه بياخذ

ولو احساس

واللى بيهوى النور

عمره ما ينداس

واول صفات الاصيل

يحفظ جميل الناس

وكل بيت اتبنى

لازم يكن له أساس

أحلف يا نور القلوب

أنك ضيا الإحساس
بديع ربى ف صنعته
تكوينك الحساس

بيغير

بيغير جدا

لو من طرف لمحنى وبص

لو من قلب

اتخبي ف ضلعه وحس

لو من روح اتشدت ليا

وهمست همس

بيغير جدا

رغم الغيره بتبقى عنيفه

تفرد جناح بريشة خفيفه

وتعزف لحن بأئه رهيفه

بيغير جدا

من ضمة فستاني عليا

من خط اتهور أو فگر

يحد فوق شط عنيا

لو نسمة نسيت و اترسمت

فوق ضلى شويه

بيغير جدا

أنا فعلا بعشق فيه الغيره

وبموت لو أشوف ف عنيه

مشهد حيره

هو الحب أنانى بطبعه

لكن قلبه علانى فوق عرشه وقالى

حقك يا أميره

يكفاك

ريحة السفر جواك

تتمدد على ضلى

وانا القتيل بهواك

الشوق حارمنى

ليه يا مهر بتموت

لما تملك الننى

دنا كنت ريحة الغيطان

وكنت الطوفان

أنا صوت أدان

لما تفيض الروح

تهيم ترتلنى
والقمر عاشق
مكانه ف السما
لما ارتمى
دموع العين قتلتنى
ومش ها قول يكفاك
قلبى لما بغاك
شق الضلوع منى
راح اعلموا يجفأك
لو للموت يقاربنى
حرفى ما راح ينداك
ولو بدماك
من تانى تكتبنى

توب فستانی

قاعد یغزل توب فستانی

خیط من فضاة وجدانی

خیط من عین رفت علشانی

شفت... قلب

اتحنی وحننا زهور بستانی

ایوه عشانی

قاعد یغزل توب فستانی

خیط من نقطة ف بحر حنانی

ویحلف بعد م رسم التوب

جنة وورانی ان الجنة فی حضن زمانی

توهب له حياته من تانى
قلبك كان م البدء بينزف
فدا لحظة لو يلقاتى
لضم العقد حبوب عشقاتى
حبه بترقص
لما بتحرس طيف إلهامى
وحبة...وحبة
وكل العشق الناسف احزانى
هوا هدانى
دمعة ونزلت غصب
بتحكى إن الحب أنانى
ولما حنين وجعى اتبنانى
فديت الدمعة بكل كيانى

سنابل قمح

الأرض أهي قايمه بتصبح
وعيدان القمح عايزانى
أدوب فى حبوبها من تانى
وانا أصلى كنت دوبت زمان
وهيا لسه تشبهنى
خضار القد والننى
تمر جحنى وبتشلىنى
تطبطب قلبى م الدمعه
وتطفى أى نار والعه
وحب دهبها م الطلعه

كيانى

بيحرسنى وببوسنى

ف خد حرير

أنا بينى وبينها هدير

العشق وهيامه

ولما بشوف سنابل قمح

بدوب ف نهر أيامه

وكنت بغير عليه م الطير

لو يحط فوقيه

واحضن التراب وارقيه

أنا فأكره وهوا كمان

ولو عدت من الزمان أزمان

هيفضل حبى بيكحل

سنابلہ الخضر

ولما يشوفنى وانا ماشيه

يدوب العمر ويندهلى

نغمة حنين

كيان الروح بيتوزع دواير فل

ولون الموج بيتدلّع

على نغمة حنين بتطل

واجمل حاجة ف العاشق

عيونه لما تتراشق

ومشاعره لما تتعايق وتسبى الكل

ومين اللى راح يوصف

شجن صوتك

ف نبرة حب ف سكوتك

بانها ذل

اكتب عشانها

لما قولت اكتب عشانها

كان عشانها مش عشانى

هيا باقيه

أما أنا فانى فى حبك

لو زمانى منحنى تانى

(اختيارى إن (احبك

يكفى إنى بدوب ف ضلك

واللى منى بات فاضلك

بس هيا أولى منى بالعبير

رغم موتها راح تغير

اكتب عشاتها
كل القصايد
هى تستاهل كثير
..... الندى
عاتب عيونى إن أقولك
هو أصله حته منك
بس برضو حته منى
لو بتوصف حبه منه
فى المرايا هابقى انا
روح الندى

الفراش لو حب يوم

أنا قولت ارمى التماسى

لما لقيتك للقمر ناسى

لمعت فى عينك نجوم

مع إن الفراش

لو حب يوم بيحوم

يهذى كما المحروم مشتاق لإحساسى

حتى لحد الموت ويقضى عمره سكوت

.... فدا لحظه

لو يروح ويعود

على نور الجبين راسى

محتوى الكتاب

م	المحتوى	صفحة
1	بطاقة الكتاب	2
2	الإهداء	3
3	مفتتح	4
4	دييب	5
5	شروق	6
6	دندنة	8
7	تغريدة	10
8	تأمت المواعيد	14
9	مغرم	16
10	يامصر	17
11	احتلال	20
12	حاله	22

25	موجه	13
30	جميل	14
33	حرفين نغم	15
34	حدوته	16
38	شبابيك	17
40	كتاب	18
42	روح الربيع	19
44	شكل تانى	20
47	هل معقول	21
49	شكوتى	22
51	رمشك شابك	23
53	اتمنى عليا	24
55	نبض الحروف	25
57	عيونك الحلوين	26
59	معناة الكلام	27

61	آخر شهقه	28
64	البحر بيمسى	29
66	وصفه	30
68	صعيب قلبك	31
70	فضفضة	32
72	حكايتى	33
73	هاقفل الشباك	34
75	ريشة الشعر	35
77	كلمات	36
79	أصيل	37
81	بيغير	38
83	يكفاك	39
85	توب فستانى	40
87	سنابل قمح	41
90	نعمة حنين	42

91	اكتب عشانها	43
93	الفراش لو حب يوم	44
94	محتوى الكتاب	45